

ESTATUTOS DA FEDERACIÓN GALEGA DE LOITA e DISCIPLINAS ASOCIADAS





FEDERACIÓN GALEGA DE LOITA e DA
Rua Fotógrafo Luís Ksado, Nº 17, Ofic. 6
36209 VIGO

Tlf: (0034) 986 247 519
E-mail info@fegaloita.es
www.fegaloita.es



XUNTA DE GALICIA
PRESIDENCIA
Secretaría Xeral para o Deporte

INDICE

TÍTULO I- DISPOSICIÓN XERAIS	3
CAPÍTULO PRIMEIRO: DENOMINACIÓN, NATUREZA XURÍDICA, OBXECTO SOCIAL E DOMICILIO	3
CAPÍTULO SEGUNDO: REQUISITOS PARA SER MEMBRO DA FEDERACIÓN	6
DEREITOS E DEBERES	6
CAPÍTULO TERCEIRO: ESTRUCTURA TERRITORIAL	8
TÍTULO II: DOS ÓRGANOS DE GOBERNO E REPRESENTACIÓN	8
CAPÍTULO PRIMEIRO: NORMAS XERAIS	8
CAPÍTULO SEGUNDO: DA ASEMBLEA XERAL	10
SECCIÓN PRIMEIRA: NATUREZA, COMPOSICIÓN, NOMEAMENTO E CESE	10
SECCIÓN SEGUNDA: RÉXIME DE FUNCIONAMENTO	12
CAPÍTULO TERCEIRO: DA COMISIÓN DELEGADA. NATUREZA, CONSTITUCIÓN, COMPOSICIÓN E FUNCIONAMENTO	16
CAPÍTULO CUARTO: DO PRESIDENTE	16
TÍTULO TERCEIRO: ÓRGANOS COMPLEMENTARIOS DOS DE GOBERNO E REPRESENTACIÓN	18
TÍTULO CUARTO: DOS ÓRGANOS TÉCNICOS E ASESORES	20
CAPÍTULO UN: COMISIÓNS EN XERAL	20
CAPÍTULO DOUS: COMITÉ DE XUÍCES-ÁRBITROS	21
TÍTULO QUINTO: RÉXIME ELECTORAL	22
CAPÍTULO PRIMEIRO: OS CENSOS	22
CAPÍTULO SEGUNDO: REGULAMENTO ELECTORAL	22
CAPÍTULO TERCEIRO: A COMISIÓN XESTORA	23
CAPÍTULO CUARTO: CIRCUNSCRIPCIÓN ELECTORAL	23
CAPÍTULO QUINTO: XUNTA ELECTORAL	24
CAPÍTULO SEXTO: MESAS ELECTORAIS	24
CAPÍTULO SÉTIMO: RECURSOS	24
CAPÍTULO OITAVO: ELECCIÓN DA ASEMBLEA XERAL	24
CAPÍTULO NOVENO: ELECCIÓN DE PRESIDENTE	25
CAPÍTULO DÉCIMO: ELECCIÓN COMISIÓN DELEGADA	26
TÍTULO SEXTO: RÉXIME ECONÓMICO	26
TÍTULO SÉTIMO: RÉXIME DOCUMENTAL	29
TÍTULO OITAVO: RÉXIME DISCIPLINARIO E XURISDICCIONAL	30
TÍTULO NOVENO: DA MODIFICACIÓN DOS ESTATUTOS E DA DISOLUCIÓN DA FEDERACIÓN GALEGA DE LOITA	40



TÍTULO I- DISPOSICIÓN XERAIS

CAPÍTULO PRIMEIRO: DENOMINACIÓN, NATUREZA XURÍDICA, OBXECTO SOCIAL E DOMICILIO

Artigo 1º.- A FEDERACIÓN GALEGA DE LOITA E DISCIPLINAS ASOCIADAS. (en diante a Federación) é unha entidade privada, sen ánimo de lucro, con personalidade xurídica propia e plena capacidade de obrar, cun ámbito territorial que comprende a Comunidade Autónoma de Galicia para cumprimento dos fins que lle son propios, estando integrada polos Clubs deportivos, as seccións deportivas, deportistas, técnicos, adestradores, xuíces, árbitros e outros colectivos interesados estatutariamente establecidos, co obxectivo de promover, practicar e, en xeral, contribuír ao desenvolvemento dunha mesma modalidade ou especialidade deportiva.

A FEDERACIÓN ademais das súas propias competencias, exerce por delegación funcións públicas de carácter administrativo actuando como axente colaborador da Administración pública.

Artigo 2º.- A FEDERACIÓN organízase orgánica e funcionalmente de forma democrática e representativa, con personalidade xurídica e patrimonio propio e independente do dos seus asociados, e plena capacidade de obrar, coas limitacións sinaladas pola Lei e disposicións vixentes, e pode adquirir, para os seus propios fins, bens de toda clase, mobles e inmoables, contratar e obrigarse para o cumprimento das súas finalidades e está suxeita ás súas propias responsabilidades.

A FEDERACIÓN atópase integrada na Federación Española da mesma especialidade, ostentando de xeito exclusivo a representación desta dentro da Comunidade Autónoma de Galicia no referente ó deporte que constitúe o seu obxecto social, conservando en tal integración a súa personalidade xurídica, o seu patrimonio propio e diferenciado, o seu presuposto e o seu réxime xurídico particular.

Artigo 3º.- A FEDERACIÓN ten como obxecto social promocionar, dirixir e ordenar con carácter exclusivo dentro de Galicia, sen prexuízo das competencias concorrentes das distintas Administracións Públicas, as actividades propias da súa especialidade deportiva, en coordinación cos organismos correspondentes da Xunta de Galicia, e rexerase por estes Estatutos e os seus



Regulamentos, polos da Federación Española da mesma especialidade, no que lle sexan aplicables, e polas disposicións que dite a Xunta de Galicia e, supletoriamente, a Administración do Estado.

A FEDERACIÓN é a única entidade competente dentro da Comunidade Autónoma de Galicia para promocionar, regulamentar, organizar, xestionar e controla-las competicións oficiais do deporte da loita e das disciplinas asociadas.

Artigo 4º.- As **especialidades deportivas** que se desenrolaran como competencia da Federación, son: Loita Grecorromana, Loita Libre Olímpica, Loita Sambo, Loita Praia, Loita Grappling, Loita MMA (ARTES MARCIALES MIXTAS) e Loita tradicional Galega e Leonesa. As **especialidades principais** da Federación, son as loitas olímpicas: libre e a grecorromana. Dentro de dita Federación, e sen prexuízo do recoñecemento da su propia identidade, están acollidas e se comprenden as seguintes **Disciplinas Asociadas**: SAMBO-KENO, SAMBO DEFENSA PERSOAL, DEFENSA PERSOAL POLICIAL, LOITA KRAV MAGA, LOITA NEI GONG (HUN YUAN, JISEIDO), LOITA INTEGRAL, NAHATÉ e DEFENSA PERSOAL FEMININA.

1. A FEDERACIÓN exercerá as funcións que lles atribúan os seus estatutos, así como aquelas de carácter público que se delegan na lei 3/2012 do 2 de Abril.

2. A FEDERACIÓN exercerá como funcións propias as seguintes:

a) A convocatoria das seleccións deportivas das modalidades deportivas e a designación dos deportistas que as integren.

b) Colaborar coas administracións públicas e coa federación española correspondente, así como coas restantes entidades deportivas, na promoción das súas respectivas modalidades.

c) Colaborar coa Administración deportiva autonómica na execución dos plans e programas dos deportistas galegos de alto nivel.

d) De ser o caso, e conforme a normativa que sexa aplicable, colaborar e/ou organizar as competicións oficiais e actividades deportivas de carácter estatal ou internacional que se realicen no territorio da Comunidade Autónoma de Galicia.

e) Elaborar os seus propios regulamentos deportivos.



f) Colaborar coa Administración deportiva autonómica na formación de adestradores, xuíces e árbitros segundo a normativa que sexa aplicable.

3. Os actos adoptados polas federacións deportivas galegas no exercicio das funcións públicas de carácter administrativo son susceptibles de recurso administrativo ante o Comité Galego de Xustiza Deportiva.

4. Son funcións públicas delegadas, e exerceranse en réxime de exclusividade polas federacións deportivas galegas, as seguintes:

a) Representar a Comunidade Autónoma de Galicia nas actividades e competicións deportivas da súa modalidade, consonte a normativa que lle sexa aplicable.

b) Organizar as competicións oficiais autonómicas federadas.

c) Expedir licenzas deportivas para a práctica da súa modalidade deportiva nos termos establecidos nesta lei.

d) Asignar as subvencións e as axudas de carácter público concedidas a través da federación e controlar que os seus asociados lles dean unha correcta aplicación.

e) Garantir o cumprimento das normas de réxime electoral nos procesos de elección dos seus órganos representativos e de goberno, así como dos demais dereitos e obrigas derivados do cumprimento dos seus respectivos estatutos.

f) Exercer a potestade disciplinaria nos termos establecidos por esta lei e polas súas disposicións de desenvolvemento, de acordo cos seus respectivos estatutos e regulamentos.

g) Executar, de ser o caso, as resolucións do Comité Galego de Xustiza Deportiva.

h) Colaborar coas administracións públicas competentes na prevención, no control e na represión do uso de substancias e grupos farmacolóxicos prohibidos, así como na prevención da violencia no deporte. Para estes efectos, e entre outras accións, as federacións deportivas galegas instruirán e resolverán os expedientes sancionadores que no ámbito da dopaxe se substancien, consonte o establecido no título VIII desta lei.

i) Calquera outra que regulamentariamente se determine.

5. As funcións públicas delegadas serán exercidas polas federacións deportivas galegas baixo a tutela da Administración deportiva, que, conforme se determine regulamentariamente,



procederá á súa asunción nos casos de extinción da federación ou cando esta se atope en situación concursal.

As federacións deportivas galegas exercerán as funcións públicas delegadas de forma directa, sen que poidan ser obxecto de delegación ou exercicio por ningunha substitución, sen autorización da Administración deportiva.

Artigo 5º.- O domicilio social da FEDERACIÓN establécese na cidade de Vigo en Casa do Deporte, rúa Fotógrafo Luis Ksado Nº 17, Oficina 6, C.P. 36209 de Vigo (Pontevedra).

A Comisión Delegada, por maioría dos seus membros e cando as circunstancias o aconsellen, poderá acorda-lo cambio de domicilio social dentro da mesma cidade. Para o traslado do domicilio a outra cidade, que deberá ser sempre dentro do territorio da Comunidade Autónoma de Galicia, será necesario o acordo maioritario da Asemblea Xeral. Nos dous casos, o traslado do domicilio social deberá ser notificado ós afiliados e á Secretaría Xeral para o Deporte.

Por acordo da Asemblea Xeral, e a efectos puramente de organización interna, poderanse establecer delegacións da FEDERACIÓN nas cidades de Galicia, que decida a citada Asemblea.

CAPÍTULO SEGUNDO: REQUISITOS PARA SER MEMBRO DA FEDERACIÓN.

DEREITOS E DEBERES

Artigo 6º.- Os Clubs deportivos poderán integrarse, a petición propia, na FEDERACIÓN sempre que teñan o seu domicilio social e desempeñen a súa actividade en Galicia e se atopen constituídos conforme os requisitos esixidos para cada modalidade pola lexislación vixente e inscritos no Rexistro de Clubs, Federacións e Asociacións Deportivas da Xunta de Galicia, debendo comprometerse a cumprilos Estatutos e Regulamentos da FEDERACIÓN e someterse á autoridade dos órganos federativos, en relación coa materia da súa competencia.

Os mesmos criterios e requisitos, no que lle sexa de aplicación, rexerán para a integración na FEDERACIÓN dos deportistas, técnicos, adestradores, xuíces, árbitros e outros colectivos interesados, de habelos.



Artigo 7º.- A integración na FEDERACIÓN conlevará a integración automática e a tódolos efectos na Federación Española da mesma especialidade deportiva.

Artigo 8º.- A integración na FEDERACIÓN producirase mediante a expedición por parte desta da correspondente licenza Federativa, tal e como se recolle no Regulamento de Licencias.

- a) Dita expedición será acordada pola Xunta Directiva.
- b) Dita solicitude de licenza será presentada no documento normalizado pola FEDERACIÓN
- c) O tempo de tramitación de dita licenza será de 15 días dende a súa solicitude a Federación.
- d) A licenza dará dereito a participar nas actividades propias para a que foi expedida, e o seguro de accidentes deportivos correspondente.
- e) Contra a denegación, que deberá ser motivada, caberá recurso ante a Asemblea Xeral.

En todo caso, para a participación en actividades ou competicións deportivas oficiais de ámbito autonómico será preciso estar en posesión da licenza ou documento de afiliación expedido pola FEDERACIÓN.

Artigo 9º.- Tódolos membros da FEDERACIÓN teñen dereito a recibir a tutela da mesma con respecto ós seus intereses deportivos comúns e individuais, así como o de participar nas súas actividades e no funcionamento dos seus órganos, de acordo cos presentes Estatutos e cos regulamentos internos de aquela. Os membros da FEDERACIÓN teñen, á súa vez, o deber de acata os acordos dos seus órganos, sen que isto obste ó seu dereito de recorrer, ante as instancias federativas competentes e, no seu caso, ante os Tribunais de Disciplina ou Secretaría Xeral para o Deporte, segundo proceda, aqueles que consideren contrarios a Dereito, e sen prexuízo de acudir á conciliación extraxudicial ou arbitrase nos termos previstos nas Leis.

Artigo 10º.- A perda da condición de Federado, é dicir, a perda da licenza deportiva, tal e como se recolle no Regulamento de Licencias, estará motivada polos seguintes supostos:

- a) A non renovación por parte do Federado ou do Club que o representa.
- b) O rexeitamento tácito a continuar Federado, por parte do deportista, previa comunicación a Federación.



- c) Por sanción, segundo se estipula no regulamento de réxime interno, acordado pola comisión de disciplina deportiva.
- d) Por sanción do Comité Galego de Xustiza Deportiva, se a gravidade así o indica.
- e) A no renovación por non estar ao corrente cos pagos coa Federación.

CAPÍTULO TERCEIRO: ESTRUCTURA TERRITORIAL

Artigo 11º.- A FEDERACIÓN estrutúrase territorialmente en Delegacións.

Cada Delegación quedará integrada polos Clubs, Deportistas, Adestradores e Xuíces/Árbitros, e outros colectivos, que correspondan ó ámbito territorial fixado pola Asemblea Xeral para cada Delegación.

Artigo 12º.- As Delegacións axustarán a súa actividade ás normas ditadas pola FEDERACIÓN a través dos órganos que correspondan e, sinaladamente, do seu Presidente.

Artigo 13º.- Os titulares das Delegacións serán nomeados e cesados polo Presidente da FEDERACIÓN, de acordo co artigo 32 nos presentes Estatutos.

TÍTULO II: DOS ÓRGANOS DE GOBERNO E REPRESENTACIÓN

CAPÍTULO PRIMEIRO: NORMAS XERAIS

Artigo 14º.- Son órganos de goberno e representación da FEDERACIÓN a Asemblea Xeral e o Presidente.

No seo da Asemblea Xeral deberá constituírse unha Comisión Delegada de asistencia á mesma.

Artigo 15º.-

1.- Serán órganos electivos da FEDERACIÓN o Presidente, a Asemblea Xeral e a Comisión Delegada no ámbito das súas respectivas competencias.

Os membros dos demais órganos e Comités, serán designados e revocados libremente polo Presidente coas excepcións previstas nos presentes Estatutos.



2.- O nomeamento ou a revogación dos membros dos órganos de goberno e representación, dos órganos complementarios, e dos Comités que puidesen crearse dentro da FEDERACIÓN, deberán ser comunicados a tódolos membros da Asemblea Xeral e á Secretaría Xeral para o Deporte nun prazo máximo de 15 días a partir da data do nomeamento.

3.- Os órganos de goberno e representación reuniranse na forma e termos establecidos nestes Estatutos; os seus acordos, salvo disposición expresa que dispoña o contrario adoptaranse por maioría simple; en caso de empate o Presidente terá voto de calidade. Os acordos poderán ser impugnados de conformidade co disposto na lexislación aplicable e nos presentes Estatutos.

4.- Das presidentas e dos presidentes:

4.1.- As presidentas ou os presidentes e os membros das xuntas directivas ou dos órganos de dirección que se puidesen establecer estatutariamente serán persoalmente responsables, fronte á propia federación, fronte aos seus membros ou fronte a terceiros:

a) Das obrigas que contraese a federación e que non teñan, ou tivesen, o adecuado apoio contable, non figuren nas contas presentadas e aprobadas, ou sexan obxecto dunha contabilización que non reflicta a natureza e o alcance da obriga en cuestión, e que distorsione a imaxe fiel que debe producir aquela.

b) Das obrigas que contraese contra a prohibición expresa doutros órganos federativos competentes ou da Administración autonómica, así como das obrigas que impliquen un déficit non autorizado ou fóra dos límites da autorización.

c) En xeral, dos actos ou das omisións que supoñan un prexuízo para a federación cando sexan realizados vulnerando normas de obrigado cumprimento.

4.2.- A responsabilidade descrita na alínea anterior poderase esixir no caso de existencia de dolo ou culpa na actuación dos suxeitos responsables. En todo caso, quedarán exentos de responsabilidade aqueles que votasen en contra do acordo ou non interviñesen na súa adopción ou execución, ou aqueles que o descoñecesen ou, coñecéndoo, se opuxesen expresamente a aquel.

4.3.- A responsabilidade regulada neste artigo é independente da responsabilidade disciplinaria na que se puidese incurrir, e que se esixirá consonte as disposicións xerais desta lei.



5.- Son requisitos xerais para ser membro de calquera Órgano da FEDERACIÓN, sen prexuízo do establecido regulamentariamente, os seguintes:

- a) Te-la condición de cidadán de Galicia, segundo o disposto no artigo 3 da Lei orgánica, do 1/1981, de 6 de Abril, do Estatuto da Autonomía de Galicia.
- b) Ser maior de idade e estar en pleno uso dos dereitos civís.
- c) Non estar suxeito a corrección disciplinaria de carácter deportivo que o inhabilite.
- d) Non estar condenado mediante sentenza penal firme que leve anexa pena principal ou accesoria de inhabilitación absoluta ou especial para cargo público.
- e) Non estar incurso en ningunha causa de incompatibilidade establecida legalmente ou nos presentes Estatutos.
- f) Reuni-los requisitos específicos propios de cada estamento deportivo.

CAPÍTULO SEGUNDO: DA ASEMBLEA XERAL

SECCIÓN PRIMEIRA: NATUREZA, COMPOSICIÓN, NOMEAMENTO E CESE

Artigo 16º.- A Asemblea Xeral é o Órgano superior de goberno e representación da FEDERACIÓN.

Artigo 17º.- A Asemblea Xeral estará constituída polo Presidente da FEDERACIÓN e polos representantes dos Clubs deportivos, os deportistas, os técnicos-adestradores, os xuíces-árbitros e outros colectivos, de habelos.

Os Clubs deportivos non poderán ser membros da Asemblea Xeral, se ó momento da convocatoria de eleccións non figuran inscritos no Rexistro de Clubs, Federacións e Entidades Deportivas da Xunta de Galicia.

Os compoñentes da Xunta Directiva, por este só carácter poderán asistir ás reunións da Asemblea, con dereito a voz pero sen voto.

Artigo 18º.- A Asemblea Xeral está integrada polos seguintes estamentos e segundo as porcentaxes que se especifican:



-
- Clubs deportivos: ó 60- 75%.
 - Deportistas: 20-30%.
 - Adestradores: Ata un máximo 5-10%.
 - Xuíces/árbitros: Ata un máximo 5-10%.
 - Outros colectivos: se os houber ata o 10%.

Artigo 19º.- O número de membros da Asemblea Xeral, serán fixados unha vez aprobados os censos electorais de cada un dos estamentos e tendo en conta o número de membros do estamento de clubs, cando a xunta electoral fixará o número concreto de membros de cada estamento, segundo os criterios establecidos no regulamento electoral.

Artigo 20º.- Os membros da Asemblea Xeral e a Comisión Delegada cesarán polas seguintes causas:

- a) Pasamento
- b) Disolución da entidade á que representan.
- c) Expiración do mandato para o que foi elixido.
- d) Renuncia voluntaria ou dimisión.
- e) Estar incurso en causa de inelixibilidade ou incompatibilidade legal ou estatutaria.
- f) Sanción disciplinaria imposta en forma regulamentaria que implique o cese no cargo que ostenta.

Artigo 21º.- As vacantes que se produzan na Asemblea Xeral antes das seguintes eleccións á mesma, serán cubertas, dentro de cada estamento e de xeito sucesivo, polos candidatos que no proceso electoral obtivesen maior número de votos despois dos que resultaron electos e, a falta destes, mediante a realización de eleccións parciais sempre que, neste último caso, as vacantes superen o 20% dos membros da Asemblea.

Os elixidos para ocupa-las vacantes a que se refire o apartado anterior ostentarán o seu mandato polo tempo que falte para a celebración das seguintes eleccións xerais.



SECCIÓN SEGUNDA: RÉXIME DE FUNCIONAMENTO

1. COMPETENCIAS

Artigo 22º. A Asemblea Xeral, en canto órgano de máximo goberno e representación da FEDERACIÓN, pode adoptar calquera acordo ou decisión sobre a mesma, con sometemento ás regras de competencia e procedemento. Especialmente son competencia da Asemblea Xeral as seguintes:

- 1.- A aprobación e modificación dos Estatutos da FEDERACIÓN.
- 2.- A elección mediante sufraxio libre, igual, directo e secreto do Presidente e da Comisión Delegada da FEDERACIÓN, así como o cese dos mesmos e a moción de censura ó Presidente.
- 3.- Aprobación e liquidación do presuposto anual da FEDERACIÓN
- 4.- Aprobación do programa ou calendario deportivo anual a desenvolver pola FEDERACIÓN e das bases ou regulamentos que rexerán a competición.
- 5.- Aprobación da creación de Órganos Territoriais da FEDERACIÓN.
- 6.- Aprobación do Regulamento de Eleccións á Asemblea Xeral, Presidente e a Comisión Delegada da FEDERACIÓN.
- 7.- Aprobación do Regulamento sobre conciliación extraxudicial ou arbitraje.
- 8.- Aprobación do Regulamento de Xustiza Deportiva.
- 9.- Calquera outra competencia da FEDERACIÓN que non estea expresamente atribuída polos presentes Estatutos a outro órgano.

2.CONVOCATORIA

Artigo 23º.- A Asemblea Xeral será convocada polo Presidente da FEDERACIÓN, cun mínimo de 10 días naturais de antelación á data da súa celebración, no taboleiro de anuncios da FEDERACIÓN, debendo incluír necesariamente os puntos da orde do día a tratar, ademais da notificación persoal a cada un dos membros ó domicilio que deberá constar na Federación 30 días antes da data da convocatoria; a notificación remitirase por calquera medio que permita ter constancia da recepción que terá lugar cunha antelación mínima de corenta e oito horas á hora da reunión. Os



defectos formais na convocatoria non darán lugar á nulidade da Asemblea sempre e cando os membros da mesma recibisen a convocatoria coa orde do día no prazo establecido e, en todo caso, a Asemblea será válida, sen necesidade de ningún outro requisito, sempre que concorran a totalidade dos membros da mesma.

A orde do Día poderá ser modificada no sentido de incorporar novos puntos a petición fundada dun quinto dos membros da Asemblea Xeral e sempre que esta incorporación se solicite cunha marxe de tempo suficiente para que poida ser notificada a tódolos membros da Asemblea Xeral mediante a notificación e a publicación no taboleiro de anuncios da FEDERACIÓN cunha antelación mínima de 3 días á data da celebración.

Artigo 24º.- O Presidente da FEDERACIÓN deberá convocar unha Asemblea Xeral Ordinaria anualmente antes do inicio da nova tempada deportiva para trata-los asuntos propios da xestión ordinaria e, como mínimo, para a aprobación da Memoria anual de actividades, a aprobación do novo presuposto e a liquidación do anterior, aprobación do calendario deportivo e das regras que rexerán a competición e o exame e consideración das propostas que formulen os membros da Asemblea Xeral, da Comisión Delegada, da Xunta Directiva e o Presidente.

Tódalas demais Asembleas terán carácter extraordinario e serán convocadas polo presidente da FEDERACIÓN sempre que o estime oportuno, ou a petición dun número de membros que integran a Asemblea Xeral non inferior ó 25%. Neste caso, os solicitantes deberán formular unha petición por escrito dirixido ó Presidente da FEDERACIÓN, indicando os puntos que comporán a orde do día. O Presidente, no prazo máximo de 10 días naturais dende a entrada da petición no rexistro da FEDERACIÓN deberá convoca-la Asemblea Xeral con carácter extraordinario, cos requisitos de forma sinalados nestes Estatutos, e coa orde do día solicitada, sen incluír ningún outro punto, a celebrar nun prazo non superior a 20 días naturais dende a convocatoria. Caso de negativa expresa do Presidente a efectua-la convocatoria, ou pasados 10 días dende que a solicitude se efectuase sen ter resposta, os solicitantes poderán facer uso dos dereitos que a lexislación vixente establece, ante a Secretaría Xeral para o Deporte para a convocatoria dos órganos colexiados de goberno.

Cando o Presidente da FEDERACIÓN aprecie a existencia dunha situación urxente que non permita demora na convocatoria da Asemblea Extraordinaria, poderá convocala sen suxeición a prazo nin



requisito de forma ningún, salvo a citación persoal dos assembleístas que poidan ser localizados nos domicilios que consten na Federación. En todo caso a Asemblea requirirá como mínimo a presenza de 2/3 dos seus membros e antes de analiza-la orde do día pronunciárase previamente, por maioría dos asistentes, sobre a urxencia da convocatoria e a necesidade ou non da súa celebración. A Asemblea Xeral convocada desta forma non poderá modifica-los Estatutos.

3. CONSTITUCIÓN

Artigo 25º.- A Asemblea Xeral quedará validamente constituída en primeira convocatoria, cando a ela concorran a maioría dos seus membros.

En segunda convocatoria será válida sexa cal sexa o número de asistentes. Deberá mediar un mínimo de media hora entre a primeira e a segunda convocatoria.

4. ADOPCIÓN DE ACORDOS

Artigo 26º.- Non será admisible en ningún modo para a formación da vontade dos órganos colexiados da FEDERACIÓN nin para o establecemento do seu quórum o voto por correo nin a delegación de voto sendo, por tanto, necesaria a presenza física dos seus membros. Exceptúanse as eleccións dos membros da Asemblea Xeral, se así se aprobase no Regulamento Electoral.

Con carácter excepcional os Clubs deportivos poderán ser representados de conformidade ós seus propios Estatutos, pero o representante non poderá ser membro da Asemblea Xeral.

Ningún poderá ostentar na Asemblea Xeral máis dunha delegación de voto.

Artigo 27º.- As votacións no seo da Asemblea Xeral realizaranse na forma e pola orde que a Presidencia estableza, sendo esta a que decidirá se son ordinarias, nominais ou secretas; se ó menos o 25% dos asistentes solicita unha modalidade determinada, a forma de votación decidírase por maioría simple dos membros da Asemblea Xeral.



Artigo 28º.- A Asemblea Xeral será presidida polo Presidente da FEDERACIÓN, e o seu voto será de calidade en caso de empate. Os acordos adoptaranse por maioría simple dos asistentes.

Os efectos de cómputo de quóruns e maiorías, cando estes se conformen cun número inexacto de asembleístas, computaranse sempre por exceso con referencia ó número de aqueles efectivamente existentes como membros da Asemblea, descontadas as vacantes.

Artigo 29º.- De tódolos acordos adoptados na Asemblea Xeral e Comisión Delegada, levantarase acta polo Secretario das mesmas, especificando o nome das persoas que interviñesen e as demais circunstancias que se consideren oportunas, contido dos acordos adoptados, o resultado da votación e, no seu caso, os votos particulares contrarios ó acordo adoptado.

Os votos contrarios ó acordo adoptado ou as abstencións motivadas eximirán a quen os emitan de calquera responsabilidade derivada de tales acordos.

Artigo 30º.- Os acordos da Asemblea Xeral e da Comisión Delegada, serán vinculantes e de obrigatorio cumprimento para a totalidade dos órganos, persoas e entidades que integran a FEDERACIÓN e terán forza executiva a partir da data da súa adopción. Estes acordos serán publicitados mediante:

- a) Circulares periódicas os membros da asemblea e os demais membros da Federación.
- b) Serán colgadas nas plataformas dixitais oficiais da Federación Galega de Loita e D.A.
- c) Publicitaranse no taboleiro de anuncios, na sede da Federación.

Artigo 31º.- A Asemblea Xeral non poderá adoptar ningún acordo ou realizar ningún acto que poida comprometer de xeito irreversible o seu patrimonio ou a actividade que constitúe o obxecto propio da FEDERACIÓN.

En caso de dúbida ou a petición dun 5% dos membros de dereito da Asemblea, será requisito imprescindible a emisión dun informe favorable, por parte dos organismos competentes da Xunta de Galicia.



CAPÍTULO TERCEIRO: DA COMISIÓN DELEGADA. NATUREZA, CONSTITUCIÓN, COMPOSICIÓN E FUNCIONAMENTO

Artigo 32º.-

1.- No seo da Asemblea Xeral deberá constituírse unha Comisión delegada que terá carácter electivo e será un órgano de goberno e representación da FEDERACIÓN.

2.- A Comisión Delegada será elixida pola Asemblea Xeral na primeira reunión que esta celebre despois da súa constitución mediante sufraxio entre os membros da mesma. O seu mandato coincidirá co da Asemblea Xeral.

3.- Estará integrada por un mínimo de 5 membros e un máximo de 15 (15%).

De producirse algunha vacante cubrirase co seguinte candidato máis votado.

4.- O Presidente da FEDERACIÓN convocará á Comisión Delegada que se reunirá, como mínimo, cada 4 meses para os fins da súa competencia e ó menos para realiza-lo seguimento da xestión deportiva e económica da FEDERACIÓN.

5.- Corresponde á Comisión Delegada da Asemblea Xeral:

- a) A elaboración dun informe previo á aprobación dos presupostos.
- b) A modificación do calendario deportivo.
- c) A modificación dos presupostos e dos Regulamentos.
- d) O seguimento da xestión deportiva e económica da FEDERACIÓN.

As modificacións non poderán exceder dos límites e criterios que a propia Asemblea Xeral estableza.

A proposta sobre os temas que se van tratar na Comisión Delegada corresponde ó Presidente ou a dous tercios dos membros da Comisión Delegada.

CAPÍTULO CUARTO: DO PRESIDENTE

Artigo 33.- O Presidente da FEDERACIÓN é o órgano de goberno e representación que ostenta a súa representación legal, convoca e preside os órganos de goberno e representación e executa os acordos dos mesmos. O Presidente poderá nomear delegados nas localidades aprobadas pola Asemblea Xeral, que actuarán seguindo as instrucións de aquel e por delegación nas funcións que



se lle encomenden. Ditos delegados poderán ser cesados ou substituídos polo Presidente segundo o seu criterio.

Artigo 34º. A duración do cargo de Presidente será de 4 anos.

No caso de que, excepcionalmente, quede vacante a Presidencia antes de que transcorra o prazo para o que foi elixido, considerarase dimisionaria toda a Xunta Directiva, constituíndose a Comisión Delegada en Comisión Xestora, presidida polo membro de maior idade. Convocará á Asemblea Xeral, e esta acordará unha nova elección do Presidente para cubri-la vacante polo tempo que falte ata o remate do prazo correspondente ó mandato ordinario. Se a vacante se produce por prosperar unha moción de censura, estarase ó disposto no artigo 36 destes Estatutos.

Artigo 35º.- O desempeño do cargo de Presidente será causa de incompatibilidade coas seguintes actividades:

- a) Ocupación de cargos directivos noutras Federacións Deportivas; exceptúase a Federación Española da mesma especialidade deportiva.
- d) Desenvolvemento de actividades ou desempeño de cargos en Asociacións Deportivas, ou Clubs dependentes integrados na FEDERACIÓN.
- c) A persoa que resulte elixida como Presidente da FEDERACIÓN deberá cesar en todo tipo de actividades técnicas e directivas no deporte específico e no ámbito territorial da FEDERACIÓN.

Non existirá incompatibilidade, en ningún caso, coa práctica activa do deporte.

Artigo 36º.- O Presidente cesará por:

- a) Transcurso do prazo polo que foi elixido.
- b) Dimisión.
- c) Incapacidade física ou psíquica para continuar no exercicio do seu cargo.
- d) Aprobación dunha moción de censura pola Asemblea Xeral.
- e) Por incorrer en causa de inelixibilidade, ou incompatibilidade. Neste último caso disporía dun prazo dun mes para cesar non posto que resulte incompatible co de Presidente.



Artigo 37º.- A moción de censura ó Presidente poderá ser presentada polos membros da Asemblea Xeral que constitúan ó menos un 25% da mesma mediante escrito presentado no Rexistro da FEDERACIÓN. Na mencionada petición deberán solicitar do Presidente a convocatoria dunha Asemblea Xeral Extraordinaria con dita moción como único punto da Orde do Día así como propor un candidato alternativo á Presidencia. Caso de prospera-la moción de censura, que se votará nun sistema de dobre volta, debendo acadala maioría absoluta de membros que compoñen a Asemblea na primeira ou maioría simple de asistentes na segunda, celebradas cunha hora de diferenza, o candidato quedará investido, cun mandato polo prazo que falte para concluí-lo período ordinario.

Para a convocatoria da Asemblea Xeral Extraordinaria a que se refire este artigo, estarase ó disposto no artigo 22 destes Estatutos. A sesión da Asemblea Xeral en que se debata a moción de censura, estará presidida polo membro de maior idade. Non será válido o voto por correo nin a asistencia por representación.

Se a moción de censura non prosperase, non poderá presentarse unha nova moción por un período de 6 meses, como tampouco poderá presentarse, caso de prosperar, contra o candidato investido na mencionada moción polo mesmo tempo.

TÍTULO TERCEIRO: ÓRGANOS COMPLEMENTARIOS DOS DE GOBERNO E REPRESENTACIÓN

Artigo 38º.- Son órganos complementarios dos de goberno e representación da FEDERACIÓN, para asistir ó Presidente:

- a) A Xunta Directiva.
- b) O Secretario Xeral.
- c) O Tesoureiro.

Artigo 39º.

1.- A Xunta Directiva é o órgano colexiado de xestión da FEDERACIÓN sendo os seus membros designados e revocados libremente polo Presidente.



O número de membros será establecido pola Asemblea Xeral e non poderá ser inferior a 5 nin superior a 15.

O Presidente elixirá entre os membros da súa Xunta Directiva un Vicepresidente, que o será tamén da Federación, que substituirá ó Presidente por delegación, imposibilidade física ou ausencia temporal; un Secretario que, á súa vez, o será da FEDERACIÓN, así como un Tesoureiro.

Tales cargos, en canto baseados na confianza, poderán ser removidos polo Presidente cando o considere conveniente.

Os membros da Xunta Directiva que no o sexan da Asemblea Xeral, terán acceso ás sesións da mesma, con dereito a voz pero sen voto.

Tódolos cargos serán gratuítos e, no caso de establecerse unha compensación económica a favor dalgún dos membros da Xunta Directiva, deberá ser expresamente acordada pola Asemblea Xeral por maioría absoluta, e constar de xeito diferenciado no Presuposto. En ningún caso a compensación económica poderá ser satisfeita con cargo ás subvención públicas que reciba a FEDERACIÓN.

2.- O Presidente da FEDERACIÓN nomeará a un Secretario, o cal exercerá as funcións de fedatario e asesor, e máis especificamente:

- a) Levantar actas das sesión dos órganos de representación da FEDERACIÓN ,con indicación dos asistentes, temas tratados, o resultado das votacións e, no seu caso, os votos particulares contrarios ó acordo adoptado.
- b) Expedi-las certificacións oportunas das actas dos órganos de goberno e representación.
- c) Remitir á Secretaría Xeral para o Deporte as actas das reunións da Asemblea Xeral e da comisión delegada no prazo de 15 días dende a data da súa celebración, así como as convocatorias das mesmas.
- d) Cantas funcións lle encomenden os Estatutos e Regulamentos da FEDERACIÓN, ou sexan delegadas polo Presidente.

3.- O Tesoureiro da FEDERACIÓN é o órgano de administración da mesma.

Exercerá como funcións propias:



- a) Leva-la contabilidade da Federación.
- b) Exerce-la inspección económica de tódolos órganos da Federación.
- c) Elaborar e presentar Informes á Comisión Delegada do estado contable da Federación.
- d) Calquera outra función que lle encomenden os Estatutos e Regulamentos da Federación.

Artigo 40º.- Para ser membro da Xunta Directiva non será necesario formar parte da Asemblea Xeral, pero si da Federación.

Artigo 41º.- Os membros da Xunta Directiva cesarán polas seguintes causas:

- a) Vacancia na Presidencia, sen prexuízo da súa conversión en Comisión Xestora nos casos previstos nestes Estatutos.
- b) Dimisión.
- c) Pasamento ou incapacidade física ou psíquica para continuar no exercicio do seu cargo.
- d) Por incorrer en causa de inelixibilidade, ou incompatibilidade.
- e) Cesados directamente polo Presidente co cumprimento das comunicacións a que se refiren os presentes Estatutos.

Artigo 42º.- A Xunta Directiva como órgano colaborador do Presidente non terá competencias propias e exercerá por delegación, as que lle encomende o Presidente que poderá avocar e revocar en calquera momento.

Artigo 43º.- Os asuntos ordinarios de trámite serán despachados polo Presidente e o Secretario.

TÍTULO CUARTO: DOS ÓRGANOS TÉCNICOS E ASESORES

CAPÍTULO UN: COMISIÓNS EN XERAL

Artigo 44º.



1.- A FEDERACIÓN poderá crear, previa aprobación pola Asemblea Xeral, cantas comisións técnicas precise, ademais das seguintes:

- a) Os Comités de Xustiza Deportiva: Comité de Competición ou Xuíz Único e Comité de Apelación.
- b) Comité de Xuíces Árbittros.
- c) A Dirección Técnica (é opcional).

Tódalas comisións rexeranse polos seus respectivos regulamentos internos e, no seu caso, pola normativa nacional unificada emanada da Federación Española da mesma especialidade, pola lexislación aplicable, e polo disposto nos presentes Estatutos.

Tódolos Presidentes dos Comités serán nomeados polo Presidente da Federación. O Secretario da Federación intervirá como Secretario de tódolos comités sen voz e sen voto, salvo que fose membro dos mesmos.

CAPÍTULO DOUS: COMITÉ DE XUÍCES-ÁRBITROS

Artigo 45º.- No seo da FEDERACIÓN constituirase, de xeito obrigatorio, un comité de Xuíces ou Árbittros, cun Presidente designado polo Presidente da FEDERACIÓN.

Este Comité poderá adopta-la estrutura territorial da FEDERACIÓN.

Serán funcións deste Comité:

- a) Establece-los niveis de formación arbitral.
- b) Clasificar tecnicamente ós Xuíces ou Árbittros, propoñendo á Xunta Directiva a adscrición ás categorías correspondentes. Estas clasificacións comunicaranse á Asemblea Xeral.
- c) Propor ós candidatos a Xuíces ou Árbittros nacionais.
- d) Propor á Xunta Directiva as normas administrativas que regulan a arbitrase, para a súa posterior aprobación pola Asemblea Xeral.
- e) Designar ós colexiados nas competición oficiais de ámbito galego.
- f) Colaborar cos órganos competentes da FEDERACIÓN.

Tódolos Presidentes dos Comités serán nomeados polo Presidente da FEDERACIÓN. O Secretario da Federación intervirá como Secretario de tódolos Comités sen voz e sen voto, salvo que fose membro dos mesmos.



TÍTULO QUINTO: RÉXIME ELECTORAL

CAPÍTULO PRIMEIRO: OS CENSOS

Artigo 46º.- Comporán os censos correspondentes a cada estamento electoral tódolos membros da FEDERACIÓN que reúnan os requisitos establecidos para cada estamento nos presentes Estatutos e no Regulamento Electoral.

CAPÍTULO SEGUNDO: REGULAMENTO ELECTORAL

Artigo 47º.- Os procesos electorais desenvolveranse conforme ó especificado no Regulamento Electoral que deberá ser aprobado pola Asemblea Xeral, a proposta do Presidente, e regulará as seguintes cuestións:

- 1.- Número de membros da Asemblea Xeral; circunscrición electoral e número de representantes que por cada circunscrición electoral corresponda a cada un dos estamentos.
- 2.- Calendario electoral.
- 3.- Censo electoral.
- 4.- Composición, competencias e funcionamento da Xunta Electoral.
- 5.- Requisitos para presentación e proclamación de candidatos. O remate para a presentación de candidatos a Presidente e membros da Asemblea Xeral virá establecido pola lexislación vixente.
- 6.- Procedemento de resolución de conflitos, impugnacións e reclamacións así como os recursos electorais.
- 7.- Regulación do voto por correo nas eleccións á Asemblea Xeral. Non se admitirán esta clase de voto nas eleccións á Comisión Delegada e Presidente.
- 8.- Composición, competencia, funcionamento e localización das Mesas Electorais.
- 9.- Número de membros da asemblea e distribución porcentual destes.
- 10.- Sistema de elección dos membros non natos da asemblea xeral.
- 11.- Elección de Presidente.
- 12.- Elección da Comisión Delegada.



13.- Sistema de substitución dos membros da asemblea que perderon a condición pola que foron elixidos.

14.- Forma e condición de realizacións de eleccións parciais para cubrir as posibles vacantes que se produzan na asemblea xeral.

15.- Modelos de sobres e papeletas.

O Regulamento Electoral deberá ser ratificado pola Secretaría Xeral para o Deporte.

CAPÍTULO TERCEIRO: A COMISIÓN XESTORA

Artigo 48º.- Acordada a convocatoria de eleccións pola Asemblea Xeral e aprobado o Regulamento electoral, o Presidente procederá no prazo sinalado no mesmo á convocatoria de eleccións á Asemblea Xeral. A partir dese momento, a Xunta Directiva e o Presidente constituiranse en Comisión Xestora, e someterán ó Regulamento Electoral á ratificación pola Secretaría Xeral para o Deporte.

A Comisión Xestora garantirá a máxima difusión e publicidade das convocatorias de eleccións á Asemblea Xeral e Presidente, así como do Regulamento Electoral coas medidas previstas nas disposicións federativas a través dun medio que permita asegura-la recepción de dita notificación. Deberá expoñerse o Regulamento Electoral en cada circunscrición electoral o mesmo día da convocatoria.

A Comisión Xestora Administrará a Federación e convocará e realizará novas eleccións no prazo máximo de tres meses no caso de que no se presentase ningunha candidatura ou non fose válida ningunha das presentadas.

CAPÍTULO CUARTO: CIRCUNSCRIPCIÓN ELECTORAL

Artigo 49º.- A circunscrición electoral será da Comunidade Autónoma de Galicia, tendo o seu domicilio a efectos federativos na súa sé de Vigo na Casa do Deporte rúa Fotógrafo Luís Ksado, Nº 17, Local 6, C.P. 36.209 de Vigo (Pontevedra).



CAPÍTULO QUINTO: XUNTA ELECTORAL

Artigo 50º.- A Xunta Electoral será elixida na Asemblea Xeral Extraordinaria e estará integrada por tres membros titulares e tres suplentes que se elixirán por sorteo entre as persoas que presenten a súa candidatura.

CAPÍTULO SEXTO: MESAS ELECTORAIS

Artigo 51º.- Para a elección dos distintos estamentos da Asemblea Xeral, do Presidente e da Comisión Delegada, constituiranse unha ou máis mesas electorais na forma establecida no Regulamento Electoral. Os membros destas mesas non poderán ser candidatos, axustándose o seu funcionamento ás normas que establezan no Regulamento Electoral.

CAPÍTULO SÉTIMO: RECURSOS

Artigo 52º.- As reclamacións e impugnacións que se presenten contra calquera acto electoral dirixiranse á Xunta Electoral e contra o que esta resolva caberá recurso ante o Comité Galego de Xustiza Deportiva. Así mesmo caberá Recurso ante o Comité Galego de Xustiza Deportiva, contra tódolos actos, acordos ou resolucións da Xunta Electoral ou calquera outro órgano ou membro da Federación en materia electoral.

CAPÍTULO OITAVO: ELECCIÓN DA ASEMBLEA XERAL

Artigo 53º.

- 1.-** Os membros da Asemblea Xeral serán elixidos cada catro anos coincidindo cos Xogos Olímpicos de Inverno mediante sufraxio libre, secreto, igual e directo entre e polos compoñentes dos distintos estamentos da Federación.
- 2.-** As eleccións á Asemblea Xeral serán acordadas pola mesma que aprobará a convocatoria con tódolos requisitos que se establecerá no Regulamento Electoral, que así mesmo se aprobe.
- 3.-** Acordada pola Asemblea Xeral a convocatoria de eleccións, o acordo será formalmente executado polo Presidente da Federación, quen firmará a mesma.
- 4.-** Dende a convocatoria para a celebración desta Asemblea Xeral a Xunta Directiva e o Presidente constituiranse en Comisión Xestora, de acordo co disposto no artigo 47 dos presentes Estatutos.



Artigo 54º.- Para ser candidato a membro da Asemblea Xeral requírese o cumprimento dos requisitos establecidos con carácter xeral no artigo 14.5 destes Estatutos.

Os requisitos esixidos pola lexislación vixente para ser electores ou elixibles, deberán terse cumpridos no día no que se publique a convocatoria de eleccións.

Artigo 55º.- As eleccións á Asemblea Xeral realizaranse para cada un dos postos correspondentes ós estamentos integrantes da mesma de acordo co previsto nestes Estatutos.

Artigo 56º.- Os representantes dos Clubs deportivos na Asemblea Xeral serán elixidos de entre todos aqueles que cumplan os requisitos establecidos na lexislación vixente no momento da convocatoria de eleccións.

Artigo 57º.- Os representantes dos deportistas na Asemblea Xeral serán elixidos de entre todos aqueles que cumplan os requisitos establecidos na lexislación vixente no momento da convocatoria de eleccións.

Artigo 58º.- Os representantes dos Técnicos-Adestradores e dos Xuíces-Árbitros na Asemblea Xeral serán elixidos de entre todos aqueles que cumplan os requisitos establecidos na lexislación vixente no momento da convocatoria de eleccións.

CAPÍTULO NOVENO: ELECCIÓN DE PRESIDENTE

Artigo 59º.- Unha vez concluídas as eleccións á Asemblea Xeral, o Presidente da Comisión Xestora, previo acordo da mesma, procederá inmediatamente á convocatoria de dita Asemblea para elixir ó Presidente e á comisión Delegada da FEDERACIÓN.

O Presidente será elixido para un período de catro anos, coincidindo cos anos en que se celebren Xogos Olímpicos de Inverno, pola Asemblea Xeral, mediante sufraxio libre, directo, igual e secreto, por tódolos membros de dita Asemblea Xeral previa a presentación e aceptación das candidaturas correspondentes. Os candidatos a Presidente poderán non ser membros da Asemblea Xeral.



Artigo 60º.- Será elixido Presidente o candidato que obteña a maioría absoluta dos membros presentes da Asemblea Xeral nunha primeira volta. En caso de non acadarse a maioría absoluta na primeira volta, realizarase unha segunda volta quedando elixido como Presidente o candidato que acadase a maioría simple dos membros presentes.

No suposto de que se presentase un só candidato, non se efectuará votación.

Artigo 61º.- Para poder ser candidato a Presidente da FEDERACIÓN, deberán reunirse as condicións seguintes:

- a) Te-la condición de cidadán de Galicia, segundo o que dispón o Estatuto de Autonomía.
- b) Ser maior de idade e estar en pleno uso dos dereitos civís.
- c) Non estar incurso en ningunha sanción deportiva que o inhabilite, dictada polos órganos disciplinarios da FEDERACIÓN ou polo Comité Galego de Disciplina Deportiva.
- d) Non estar condenado mediante sentenza xudicial firme que leve anexa pena principal ou accesoria de inhabilitación absoluta ou especial para o desempeño de cargos públicos.

Artigo 62º.- A votación será libre, igual, secreta e directa, e non se admitirá o voto por correo, nin por delegación das persoas físicas.

CAPÍTULO DÉCIMO: ELECCIÓN COMISIÓN DELEGADA

Artigo 63º.- Na mesma Asemblea Xeral convocada para a elección de Presidente, e unha vez realizada esta, procederase á elección dos membros da Comisión Delegada da Asemblea Xeral. A Comisión Delegada estará composta por 5 membros, e ademais o Presidente da FEDERACIÓN. Os membros da Comisión Delegada serán elixidos por e entre os integrantes da Asemblea Xeral. Serán elixidos membros da Comisión Delegada os que obteñan maior número de votos ata cubri-lo número de membros correspondentes á Comisión Delegada.

TÍTULO SEXTO: RÉXIME ECONÓMICO



Artigo 64º.- A FEDERACIÓN está sometida ó réxime de administración, presuposto e patrimonio propio e caixa única. A data de peche do exercicio económico será o 31 de Decembro do ano natural en curso.

O Tesoureiro someterá á Asemblea Xeral ordinaria un balance de situación e as contas de ingresos e gastos e memoria económica, así como o presuposto para a tempada seguinte, balance e presuposto que deberá ser notificado á Secretaría Xeral para o Deporte.

Non poderá aprobarse un presuposto deficitario salvo autorización da Secretaría Xeral para o Deporte. Tampouco poderán repartirse beneficios entre os seus membros.

A FEDERACIÓN elaborará unha Memoria que analizará fielmente a actividade económica da FEDERACIÓN, a súa adecuada actuación orzamentaria, o cumprimento dos obxectivos e os proxectos a desenvolver, e informará separadamente como mínimo sobre os seguintes aspectos:

1.- Diferenciación dos ingresos e aportacións segundo:

- a) Subvencións públicas.
- b) Subvencións, donativos ou aportacións privadas.
- c) Ventas de activos.
- d) Ingresos procedentes de competicións organizadas.
- e) Ingresos para servizos prestados pola Federación, permisos, licencias e outros.
- f) Ingresos financeiros.

2.- Tamén constará o destino da totalidade dos recursos, distinguindo como mínimo os grupos de custe ou inversións seguintes:

- a) Administración da Federación.
- b) Dirección e servizos da Directiva, incluíndo viaxes.
- c) Competicións.
- d) Axudas para actos deportivos.
- f) Construcións e outros inmovilizados.
- g) Formación de deportistas e técnicos.
- h) Deportes de elite e profesional.
- i) Árbitros.
- j) Órganos xurisdicionais.



3.- O importe das obrigas de pago que cómpre satisfacer noutros exercicios que non estean previstos no balance.

4.- O importe das garantías e os avais comprometidos.

5.- A liquidación do presuposto, que explique as variacións en relación co presuposto aprobado na Asemblea anterior.

As contas anuais e os presupostos estarán no domicilio social da Federación cunha antelación mínima de 15 días á data de celebración da Asemblea Xeral, a disposición das persoas ou entidades con dereito a voto, na mesma, as cales poderán pedir copia que se deberá entregar antes da celebración da Asemblea.

Artigo 65º.- Constitúen os ingresos da FEDERACIÓN.

- a) As subvencións ordinarias e extraordinarias da Xunta de Galicia ou as que outras Entidades Públicas poidan concederlle, así como as provenientes, no seu caso, da Federación Española da mesma especialidade deportiva.
- b) Os bens ou dereitos que reciba por herdanza, legado ou doazón de persoas físicas ou Entidades particulares así como os premios que lle sexan outorgados.
- c) As cotas dos seus afiliados.
- d) As sancións pecuniarias que se impoñan ós seus afiliados dentro do exercicio da potestade disciplinaria.
- e) Os froitos, rendas e intereses dos seus bens patrimoniais.
- f) Os préstamos ou créditos que se lle concedan.
- g) Os beneficios que produzan as actividades e competicións deportivas que organice, así como os derivados dos contratos que realice.
- h) Calquera outro que poida serlle atribuído por disposición legal ou en virtude de convenio.

Artigo 66º.- A FEDERACIÓN destinará a totalidade dos seus ingresos e patrimonio á consecución dos fins propios do seu obxecto social.



Artigo 67º.- A xestión económica ordinaria correrá a cargo do Tesoureiro, baixo a dirección do Presidente, ou coa do Vicepresidente autorizado, tódolos documentos de movementos de fondos. Será responsable da levanza e custodia dos libros de contabilidade. Formulará os balances que anualmente, deberán presentarse á Asemblea Xeral para a súa aprobación.

O orzamento para o seguinte exercicio económico terá que ser aprobado en asamblea, durante o último trimestre do exercicio económico en curso, e remitirase a administración deportiva no prazo dun mes dende a súa aprobación.

TÍTULO SÉTIMO: RÉXIME DOCUMENTAL

Artigo 68º.- O réxime documental da FEDERACIÓN comprenderá, como mínimo, os seguintes libros debidamente dilixenciados:

- a) Libro de Rexistro de Entrada e Saída de documentos e comunicacións oficiais.
- b) Libro de Rexistro de Clubs nos que constará a denominación destes, domicilio social e número de inscrición no Rexistro de Clubs, Federacións e Entidades Deportivas da Xunta de Galicia.
- c) Libros de Contabilidade.
- e) Libro inventario de bens mobles e inmoables.
- f) Rexistro dos membros da Asemblea Xeral e da Comisión Delegada no que deberán consta-los nomes dos titulares ou representantes legais e os domicilios para as citacións e comunicacións.

Artigo 69º.- O réxime documental da FEDERACIÓN estará a cargo do Secretario, a quen corresponde a custodia dos libros da Federación, levantar actas das reunións dos órganos colexiados e, unha vez aprobadas, asinadas co visto e praxe do presidente, expedir certificacións, remiti-las certificacións e acordos que procedan á Secretaría Xeral para o Deporte e, en xeral, prepara-la resolución e despacho de tódolos asuntos.

En caso de ausencia ou imposibilidade física do Secretario as súas funcións serán desempeñadas polo propio Presidente da Federación ou pola persoa en quen delegue.



TÍTULO OITAVO: RÉXIME DISCIPLINARIO E XURISDICCIONAL

Artigo 70º.- A FEDERACIÓN en materia de disciplina deportiva, ten potestade sobre tódalas persoas que formen parte da súa estrutura orgánica, os Clubs Deportivos e os seus deportistas, técnicos e directivos, os Xuíces e Árbitros e, en xeral, todas aquelas persoas e entidades que, estando federados, desenvolvan a actividade que constitúe o seu obxecto social no ámbito da Comunidade Autónoma de Galicia.

Artigo 71º.- Os órganos competentes en materia disciplinaria serán:

- a) En primeira instancia un Comité de Competición ou Xuíz Único.
- b) En segunda instancia, un Comité de Apelación.

Ámbolos órganos rexeranse por e aplicarán o disposto na Lei 3/2012 do 2 de Abril.

O Comité de Competición ou Xuíz Único de Competición estará integrado por un número de membros entre 1 e 3 nomeados pola Asemblea Xeral de entre os membros da Federación. O Comité de Apelación estará integrado por 3 membros, así mesmo nomeados pola Asemblea Xeral entre os membros da FEDERACIÓN.

A duración do cargo coincidirá coa da Asemblea Xeral que os nomease e durante dito período só cesarán por renuncia ou dimisión, pasamento, incapacidade física ou psíquica, perda da condición de membro da Federación, e sanción que o inhabilite para o cargo.

Unha vez elixidos os membros dos Comités, este designarán os seus Presidentes na primeira reunión que celebren.

A composición destes Comités será comunicada á Secretaría Xeral para o Deporte na forma prevista nestes Estatutos.

Artigo 72º.- As resolucións ditadas polo Comité de Apelación dentro das súas competencias, terán carácter definitivo no ámbito da FEDERACIÓN e poderán ser recorridas ante o Comité Galego de Xustiza Deportiva conforme á lexislación vixente.



Artigo 73º.- Disposicións xerais sobre faltas e sancións.

- a) Son faltas disciplinarias as infraccións das regras do xogo ou da competición e as infraccións das normas xerais de conduta deportiva.
- b) A tipificación das infraccións, consonte as peculiaridades da modalidade deportiva en cuestión, e tamén as sancións correspondentes a cada unha daquelas.
- c) Non poderán impoñerse mais de unha sanción polos mesmos feitos.
- d) As disposicións disciplinarias teñen efecto retroactivo en canto favorezan o infractor, aínda que no momento de publicación das disposicións mais favorables houbera recaído sanción firme.
- e) Non poderá impoñerse sanción algunha por accións ou omisións non tipificadas como infraccións con anterioridade ao momento de producirse, nin tampouco poderán impoñerse sancións que non sexan establecidas por norma anterior a comisión da infracción.

Artigo 74º.- *Natureza e clasificación das infraccións.*

- 1. As infraccións clasifícanse en moi graves, graves e leves. As sancións correspondentes aplicaranse en función da clasificación das infraccións.
- 2. Consideraranse infraccións moi graves as seguintes:
 - a) As actuacións dirixidas a predeterminar, mediante prezo, intimidación ou simple acordo ou decisión, o resultado dunha proba, encontro ou competición.
 - b) Os comportamentos e actitudes agresivos e antideportivos ou discriminatorios dos xogadores ou técnicos, cando se dirixan ao árbitro, aos xurados, a outros xogadores, técnicos ou ao público.
 - c) Os quebrantamentos de sancións impostas.
 - d) A manipulación ou alteración, xa sexa persoalmente ou a través de persoa interposta, do material ou equipamento deportivo en contra das regras técnicas de cada deporte cando poidan alterar a seguridade da proba, do encontro ou da competición ou poñan en perigo a integridade das persoas.
 - e) Non executar ou desobedecer as resolucións no ámbito disciplinario do Comité Galego de Xustiza Deportiva.



f) A inasistencia sen xusta causa dos deportistas ás convocatorias da selección galega ou a negativa da entidade deportiva a facilitar a súa asistencia.

g) A aliñación indebida e non comparecer ou retirarse inxustificadamente das probas, dos encontros ou das competicións.

h) A reincidencia na comisión de faltas graves. Entenderase que hai reincidencia na comisión cando se sexa sancionado mediante resolución firme pola comisión de tres ou máis infraccións graves no período dun ano.

Da infracción á que se refire a letra e) poderá ser responsable a presidenta ou o presidente da federación, sen prexuízo das responsabilidades nas que poidan incorrer outras persoas físicas integrantes dos órganos federativos.

3. Consideraranse infraccións graves as seguintes:

a) A falta de remisión en prazo ou de forma manifestamente incompleta, sen xusta causa, dos expedientes ou da información requirida polo Comité Galego de Xustiza Deportiva.

b) O incumprimento de ordes e instrucións emanadas dos órganos deportivos competentes.

c) Actuar de forma pública e notoria contra a dignidade e o decoro propios da actividade deportiva.

d) A reiteración de faltas leves. Entenderase que hai reiteración cando se sexa sancionado mediante resolución firme pola comisión de tres ou máis infraccións leves no período dun ano.

Das infraccións ás que se refiren as letras a) e b) poderá ser responsable a presidenta ou o presidente da federación, sen prexuízo das responsabilidades nas que poidan incorrer outras persoas físicas integrantes dos órganos federativos.

4. Consideraranse infraccións leves as seguintes:

a) As condutas contrarias ás normas deportivas que non estean incursas na cualificación de moi graves ou graves.



- b) A incorrección co público, cos compañeiros e cos subordinados.
- c) A adopción dunha actitude pasiva no cumprimento das ordes e instrucións recibidas de xuíces, árbitros e autoridades deportivas no exercicio das súas funcións.

Artigo 75º.- Sancións.

1. Pola comisión de faltas moi graves impoñeranse as seguintes sancións:

- a) Multa en contía non superior a 1.500 euros.
- b) Perda de puntos ou postos de clasificación.
- c) Perda de ascenso de categoría ou división.
- d) Clausura do recinto deportivo por un período máximo dunha tempada.
- e) Suspensión ou privación da licenza federativa ou, de ser o caso, da inscrición no Rexistro de Entidades Deportivas de Galicia, ou da habilitación para ocupar cargos nunha federación deportiva por un prazo máximo de cinco anos.
- f) Privación da licenza federativa, cancelación da inscrición no Rexistro de Entidades Deportivas de Galicia ou privación da habilitación para ocupar cargos na federación deportiva a perpetuidade. Esta sanción só se poderá acordar, de modo excepcional, pola reincidencia en infraccións de extrema gravidade.
- g) Inhabilitación por un período de dous a catro anos, cando as infraccións sexan cometidas por directivos.
- h) Destitución do cargo, cando as infraccións sexan cometidas polos directivos.

2. Pola comisión de faltas graves impoñeranse as seguintes sancións:

- a) Amoestación pública.
- b) Multa en contía non superior a 1.000 euros.
- c) Clausura do recinto deportivo ata un máximo de catro encontros ou tres meses.
- d) Suspensión ou privación da licenza federativa e/ou, se é o caso, da inscrición no Rexistro de Entidades Deportivas de Galicia, e inhabilitación para ocupar cargos dun mes a dous anos.



3. Pola comisión de faltas leves imponse as seguintes sancións:

- a) Apercibimento.
- b) Inhabilitación para ocupar cargos federativos ou suspensión de ata un mes, ou dun a tres encontros ou probas.

4. As federacións deportivas poderán establecer un sistema de infraccións e sancións que, como mínimo, deberá recoller o disposto nesta lei.

5. As multas só se lles poderán imponse ás entidades deportivas e aos que, conforme esta lei, sexan considerados deportistas profesionais ou técnicos profesionais.

Artigo 76º.- Principio de proporcionalidade.

- 1. No establecemento de sancións pecuniarias deberase prever que a comisión das infraccións tipificadas non resulte máis beneficiosa para a persoa infractora que o cumprimento das normas infrinxidas.
- 2. Na determinación do réxime sancionador, así como na imposición de sancións polas administracións públicas, deberase gardar a debida adecuación entre a gravidade do feito constitutivo da infracción e a sanción aplicada.
- 3. Para graduar as sancións teranse en conta as circunstancias concorrentes, a natureza dos feitos, as consecuencias e os efectos producidos, a existencia de intencionalidade, a reincidencia e a concorrencia de circunstancias agravantes ou atenuantes.
- 4. En función das circunstancias previstas nas alíneas anteriores, as sancións aplicaranse nos seus graos máximo, mínimo ou medio. De ser o caso, de concorreren circunstancias atenuantes cualificadas, poderase aplicar a sanción inferior nun grao á prevista.

Artigo 77º.- Circunstancias modificativas da responsabilidade.



1. Serán consideradas como circunstancias atenuantes o arrepentimento espontáneo e a existencia de provocación suficiente inmediatamente anterior á comisión da infracción.
2. Serán consideradas como circunstancias agravantes da responsabilidade a reincidencia, o prezo, o prexuízo económico ocasionado e o número de persoas afectadas pola infracción respectiva.
3. Entenderase producida a reincidencia cando a persoa infractora cometa, polo menos, unha infracción da mesma natureza declarada por resolución firme, no termo dun ano.
4. Os órganos disciplinarios sancionadores poderán, no exercicio da súa función, aplicar a sanción no grao que consideren adecuado, ponderando, en todo caso, a natureza dos feitos, a personalidade do responsable, as consecuencias da infracción e a concorrencia de circunstancias atenuantes ou agravantes.

Artigo 78º.- Causas de extinción da responsabilidade.

A responsabilidade disciplinaria extínguese:

- a) Polo cumprimento da sanción.
- b) Polo falecemento da persoa inculpada.
- c) Por disolución da entidade ou da federación deportiva sancionadas.
- d) Por prescrición das infraccións ou sancións.

Artigo 79º.- Prescrición de infraccións e sancións.

1. As infraccións moi graves prescribirán aos tres anos, as graves prescribirán ao ano e, as leves, ao mes.
2. O termo de prescrición comeza a contar o día no que se cometeron os feitos e interrómtese no momento no que se acorda iniciar o procedemento sancionador. O seu cómputo restablecerase se o expediente permanecese paralizado durante un mes por causa non imputable ao presunto responsable.
3. As sancións prescribirán aos tres anos, ao ano ou ao mes, segundo se trate das que correspondan a infraccións moi graves, graves ou leves. O prazo de prescrición comezará a



contar desde o día seguinte a aquel no que adquira firmeza a resolución pola que se impuxo a sanción, ou desde o momento no que se quebrantase o seu cumprimento se este xa comezase.

CAPÍTULO IV Procedementos disciplinarios deportivos

Artigo 80º.- Procedemento disciplinario.

A imposición de sancións pola comisión das infraccións previstas no capítulo III do título VII desta lei axustarase aos procedementos que se conteñen neste capítulo.

Artigo 81º.- Clases de procedementos.

1. Os procedementos para a imposición de sancións serán o abreviado e o ordinario.
2. O procedemento abreviado é aplicable para a imposición das sancións por infracción das regras do xogo ou da competición. A súa concreción deberá realizarse nos estatutos das federacións deportivas atendendo ao previsto no artigo 106, e, na súa regulación, deberá asegurar o normal desenvolvemento da competición. En todo caso, deberá asegurarse o trámite de audiencia ás persoas interesadas e o dereito ao recurso.
3. O procedemento ordinario será aplicable para as sancións correspondentes ás infraccións das normas xerais de conduta deportiva.

Artigo 82º.- Regras comúns aos procedementos.

1. No non previsto nesta lei, serán de aplicación supletoria as normas contidas na Lei 39/2015, do 1 de outubro, de réxime xurídico das administracións públicas e do procedemento administrativo común, e no Real decreto 1398/1993, do 4 agosto, polo que se aprobou o Regulamento do procedemento para o exercicio da potestade sancionadora.
2. Os procedementos sancionadores respectarán a presunción de inexistencia de responsabilidade administrativa mentres non se demostre o contrario.



3. As sancións impostas a través do correspondente procedemento disciplinario serán inmediatamente executivas, agás que o órgano encargado da resolución do recurso acorde a suspensión.

4. As actas subscritas polos xuíces ou árbitros do encontro, da proba ou da competición constituirán medio documental necesario en conxunto da proba das infraccións ás regras e normas deportivas. Igual natureza terán as ampliacións ou aclaracións a aquelas.

As manifestacións do árbitro ou xuíz plasmadas nas citadas actas presúmense certas, agás proba en contrario.

Artigo 83º.- *Procedemento abreviado.*

As regras ás que se debe axustar o procedemento abreviado son as seguintes:

1. Iniciación:

a) O procedemento abreviado iníciase coa notificación da acta da proba ou competición, que reflecta os feitos que poden dar lugar a sanción, subscrita polo xuíz ou árbitro e polos competidores ou polos delegados dos clubs.

No suposto de que os feitos susceptibles de ser sancionados non estean reflectidos na acta, senón mediante anexo, o procedemento iníciase no momento no que teña entrada na correspondente federación o anexo da acta do partido ou documento no que queden reflectidos os feitos obxecto de axuizamento. Ademais, designarase unha persoa instrutora que exercerá as funcións de impulso na ordenación do expediente e de secretaria ou secretario, e serán aplicables as causas de abstención e recusación reguladas na Lei 40/2015, do 01 de outubro, de réxime xurídico do sector público.

b) Tamén se pode iniciar por instancia da parte interesada, sempre que a denuncia se presente nas dependencias da federación correspondente dentro do segundo día hábil seguinte ao día no que se realizase a proba ou competición.

2. Tramitación e resolución:



a) No prazo de dous días, que se contarán desde a notificación prevista na alínea anterior, as persoas interesadas poderán formular alegacións en relación cos feitos consignados na acta, no anexo ou na denuncia. Poderán propoñer ou achegar tamén, se é o caso, as probas pertinentes.

A proba deberá practicarse no prazo máximo dos dous días hábiles seguintes ao da súa admisión.

b) O órgano instrutor trasladaralle, no prazo máximo de dous días que se contarán a partir da presentación de alegacións ou da práctica da proba ou da súa denegación, ao órgano competente para resolver a proposta de resolución, para que, dentro do día seguinte, se dite resolución na cal se deben expresar os feitos imputados, os preceptos infrinxidos e os que habilitan a sanción que se impoña. Así mesmo, deben expresarse na mesma resolución os motivos de denegación das probas non admitidas se non se realizase con anterioridade.

A resolución deberáselles notificar ás persoas interesadas, con expresión dos recursos que se poidan formular contra ela e do prazo para a súa interposición.

3. En función das propias características de cada federación deportiva, os seus estatutos poderán reducir os prazos previstos nas alíneas anteriores e a simplificación dos trámites previstos nelas.

Artigo 84º.- *Procedemento ordinario.*

As regras ás que se debe someter o procedemento ordinario son as seguintes:

1. Iniciación:

a) O procedemento iníciase por acordo do órgano competente, de oficio ou por instancia de persoa interesada.

b) O acordo que inicie o procedemento conterá a identidade do instrutor, se é o caso do secretario, da autoridade competente para impoñer a sanción e a norma que lle atribúa tal competencia, o prego de cargos que conterá a determinación dos feitos imputados, a identificación da persoa ou das persoas presuntamente responsables, así como as posibles sancións aplicables. Este acordo deberáselle notificar á persoa interesada.



Serán aplicables ao instrutor e ao secretario as causas de abstención e recusación e procedemento establecidas no capítulo III do título II, artigos 28 e 29, da Lei 30/1992, do 26 de novembro, de réxime xurídico das administracións públicas e do procedemento administrativo común.

2. Tramitación:

a) Durante a tramitación do procedemento, o órgano competente para incoalo, de oficio ou por instancia do instrutor, poderá acordar en resolución motivada as medidas que considere oportunas para asegurar a eficacia da resolución que poida recaer.

b) O acordo de iniciación notificaráselles ás persoas interesadas e concederáselles un prazo de dez días para contestar os feitos e propoñer a práctica das probas que conveña á defensa dos seus dereitos e intereses.

c) Practicaranse de oficio ou admitiranse por proposta da persoa interesada cantas probas sexan adecuadas para a determinación de feitos e posibles responsabilidades. Só se poderán declarar improcedentes aquelas probas que pola súa relación cos feitos non poidan alterar a resolución final a favor do presunto responsable.

d) Contestado o prego de cargos ou transcorrido o prazo para facelo, ou concluída a fase probatoria, o instrutor redactará a proposta de resolución ben apreciando a existencia dalgunha infracción imputable –e neste caso conterá necesariamente os feitos declarados probados, as infraccións que constitúan e as disposicións que as tipifiquen, as persoas que resulten presuntamente responsables e as sancións que procede impoñer– ou ben propoñendo a declaración de inexistencia de infracción ou responsabilidade e o sobresemento con arquivo das actuacións.

A proposta de resolución notificaráselles ás persoas interesadas e concederáselles un prazo de dez días para formular alegacións e presentar os documentos que consideren pertinentes.

3. Resolución:



a) Recibidas polo instrutor as alegacións ou transcorrido o prazo de audiencia, remitiralle o expediente ao órgano competente para resolver.

b) A resolución do órgano competente pon fin ao procedemento común e ditarase no prazo máximo de dez días hábiles.

4. En función das propias características de cada federación deportiva, os seus estatutos poderán reducir os prazos previstos nas alíneas anteriores e a simplificación dos trámites previstos nelas.

Artigo 85º.- Lexitimación para recorrer contra as sancións.

Están lexitimadas para interpoñer recurso en materia disciplinaria as persoas directamente afectadas pola sanción. Enténdese, en todo caso, por tales os deportistas, as súas entidades deportivas e as entidades deportivas participantes na competición.

Artigo 86º.- Órganos disciplinarios.

Os estatutos das federacións deportivas determinarán a denominación, a composición e o réxime de funcionamento dos seus órganos disciplinarios. Poderán ser unipersoais ou colexiados.

A elección dos membros dos órganos disciplinarios efectuarase consonte o establecido nos estatuto.

TÍTULO NOVENO: DA MODIFICACIÓN DOS ESTATUTOS E DA DISOLUCIÓN DA FEDERACIÓN GALEGA DE LOITA E DESCIPLINAS ASOCIADAS.

Artigo 87º.- Os Estatutos da FEDERACIÓN só poden ser modificados pola Asemblea Xeral e de acordo co establecido nos presentes Estatutos.



Artigo 88º.- A proposta de modificación dos Estatutos deberá se acordada polo Presidente ou Comisión Delegada da FEDERACIÓN, nomeándose seguidamente pola mesma unha comisión técnica que realice os traballos necesarios para presentar á Asemblea o novo texto que se someterá a aprobación.

Aprobada a reforma dos Estatutos pola Asemblea Xeral deberá ser ratificada pola Secretaría Xeral para o Deporte.

Artigo 89º.- A FEDERACIÓN extinguirase polas seguintes causas:

- a) Por acordo da maioría de 2/3 dos membros da Asemblea Xeral refrendando, por maioría absoluta, por tódolos membros da FEDERACIÓN a través de votación libre, igual, directa e secreta.
- b) Pola revogación do seu recoñecemento.
- c) Por resolución xudicial.
- d) Por integración ou fusión con outra federación deportiva galega.
- e) Polas demais causas previstas no ordenamento xurídico.
- f) Polas demais causas que determinen as Leis.

Unha vez producida a liquidación, o patrimonio neto destinarase ós fins de carácter deportivo que determine a Secretaría Xeral para o Deporte.



FEDERACIÓN GALEGA DE LOITA e DA

Rua Fotógrafo Luís Ksado, Nº 17, Ofic. 6
36209 VIGO

Tlf: (0034) 986 247 519

E-mail info@fegaloita.es

www.fegaloita.es



XUNTA DE GALICIA

PRESIDENCIA

Secretaría Xeral para o Deporte

CERTIFICAMOS

Que estes Estatutos foron aprobados na Asemblea Xeral Extraordinaria celebrada en Vigo, o 29 de Xullo de 2021.

O PRESIDENTE

José Luis Olazabal Ibars

O SECRETARIO

Florencio Pintos González